



PROJEKAT PODRŠKE GRAĐANIMA U BORBI PROTIV KORUPCIJE

NEWSLETTER ZA III KVARTAL 2020.



USAID
OD AMERIČKOG NARODA



CENTRI CIVILNIH INICIJATIVA
IZ OBLASTI GRAĐANINSKOG UČESNIČTVA



TRANSPARENCY
INTERNATIONAL
BOSNA I HERCEGOVINA



CRM



Zbog NETRANSARENTNE
DODJELE SREDSTAVA,
nema podrške za sve
organizacije u Brčko distriktu!



Projekat „Podrška građanima u borbi protiv korupcije (ACFC)“ provode Centri civilnih inicijativa (CCI), kao glavni implementator, te Transparency International BiH (TIBiH) i Centar za razvoj medija i analize (CRMA) kao partneri na projektu, a podržan je od strane Američke agencije za međunarodni razvoj (USAID). Projekat se implementira u periodu septembar 2019 – septembar 2024. godine.

Cilj projekta ACFC je povećati učešće građana u borbi protiv korupcije, te su sve projektne aktivnosti dizajnirane i osmišljene na način da potiču snažan i održiv antikorupcijski aktivizam u cijeloj zemlji, i na svim nivoima. Projekat ACFC ima za svrhu da civilno društvo bude reprezentativno i kredibilno u borbi protiv korupcije.

U okviru projekta realizuju se sljedeće aktivnosti:

- Monitoring i zagovaranje antikorupcijskih legislativa u sljedećim oblastima: sukob interesa, zaštita zviždača, javne nabavke i zloupotreba javnih sredstava u izbornim kampanjama;
- Uključivanje građana i izgradnja kulture koja odbacuje korupciju
- Koordinacija i izgradnja kapaciteta uključenih organizacija.



NE DOZVOLIMO DA NAM UKRADU RIJEKU

Udruženje građana „Za Doljanku“ je sastavljeno od mještana okolnih naselja koji su pokrenuli inicijativu za zaustavljanje radova na izgradnji i puštanja u rad minihidroelektrane Zlate, na rijeci Doljanci, koja predstavlja prirodno mrijestilište. Prema Zakonu o slatkovodnom ribarstvu na takvim rijekama zabranjena je izgradnja mHE.

Početkom augusta Udruženje „Za Doljanku“ učestvovalo je u formalnoj raspravi koju je organizirala Regulatorna agencija za energiju u Federaciji BiH (FERK) povodom zahtjeva za izdavanje dozvole za rad mHE Zlate, na kojoj su argumentovano upozorili na sve dozvole koje su izdate suprotno važećim zakonima, od institucija lokalnog do federalnog nivoa vlasti, očekujući da FERK kao posljednja instanca koja daje dozvolu za rad barem prolongira njeno davanje do rješavanja pokrenutih sudskih sporova. Međutim, FERK je ipak izdao dozvolu za proizvodnju električne energije mHE Zlate.

Iz tog razloga građani Jablanice najavljuju tužbe protiv svih nadležnih službi i pojedinaca koji su odgovorni za stavljanje u funkciju mini hidroelektrane Zlate u tom hercegovačkom gradu.



„Tu sam odgojena, rođena, ja, moji roditelji, moja djeca. Doljanka je što je dio naših života“

Naza Spahić, mještanka



Udruženje građana „Za Doljanku“



Jablanica



info@doljanka.ba



www.doljanka.ba



„Od 2014. godine možemo reći da smo svi mi, građani Doboja, u strahu od svake jače padavine, jer one na neki način mogu da izazovu poplavu“




Zoran Panić, građanin Doboja.

Građani sa područja Doboja su organizovali jednu, dok su građani iz Modriče, Vukosavlja i Šamca organizovali drugu grupu građana sa ciljem da se bore protiv nelegalne eksploatacije šljunka iz rijeke Bosne, jer neadekvatna kontrola eksploatacije riječnog šljunka direktno ugrožava preko 100.000 stanovnika ovog područja.

Nakon krivične prijave koju je grupa građana u avgustu uputila nadležnim institucijama, policija je izvršila kontrolu rada šljunkara i utvrdila da većina radi nelegalno, a da su dvije firme nastavile rad i nakon „pečaćenja“. U septembru je neformalna grupa građana organizovala i okrugli sto pod nazivom „Nelegalne šljunkare nas dave“, s ciljem doprinosa rješavanju problema nelegalne eksploatacije minerala na pomenutoj lokaciji. Ovom događaju prisustvovali su i predstavnici relevantnih institucija.

NEUREĐENA EKSPLOATACIJA ŠLJUNKA = POPLAVE



-  Neformalna grupa građana “Za legalnu eksploataciju minerala iz korita rijeke Bosne”
-  Doboje, Šamac, Modriča, Vukosavlje
-  Eksploatacija minerala iz korita rijeke Bosne



„Ovdje se igraju naša djeca, Uborak je problem svih nas“





Građani koji stoje iza inicijative „Jer nas se tiče“, su stanovnici Mostara i okolnih mjesta koji pokreću proteste, peticije, zahtjeve i sudske sporove protiv nadležnih institucija, jer nastoje dugoročno osigurati zatvaranje deponije Uborak i njenu sanaciju, te donošenje odluke o određivanju nove lokacije za regionalnu deponiju i usvajanje i poštovanje propisa koji će spriječiti njen štetan uticaj na okolinu i zdravlje stanovništva.

U julu je udruženje građana „Jer nas se tiče“, poslalo na adresu Gradske uprave Mostar, federalnog Ministarstva okoliša, premijera Vlade FBiH i federalnog inspektorata pakete s vodom iz potoka Sušica, za koje nadležne institucije tvrde da je “tehnološki ispravna” sa pozivom da je javno konzumiraju ukoliko tvrde da je ta voda tehnološki ispravna.

Pored toga građani Mostara su imali priliku potpisati peticiju za zatvaranje deponije Uborak na nekoliko lokacija u Mostaru, a svi zainteresovani građani mogu potpisati online peticiju putem linka:

https://www.peticije.online/peticija_za_zatvaranje_ilegalne_deponije_i_otvaranje_nove_lokacije



-  Građanska inicijativa „Jer nas se tiče“
-  Mostar
-  jernassetice@gmail.com
-  @jernasseticemostar



JAVNI POZIV ZA PROJEKTE VOĐENJA GRAĐANSKIH INICIJATIVA I KAMPANJA U OBLASTI **BORBE PROTIV KORUPCIJE**



KONTINUIRANI JAVNI POZIV ZA PROJEKTE VOĐENJA GRAĐANSKIH INICIJATIVA I KAMPANJA U OBLASTI BORBE PROTIV KORUPCIJE

Poziv OCD (udruženjima građana i fondacijama) iz BiH da podnesu prijedloge projekata usmjerenih na borbu protiv korupcije, s fokusom na rješavanje konkretnih problema identifikovanih na lokalnom nivou ili zagovaračkih inicijativa usmjerenih ka višim nivoima vlasti.

Od aplikanata se traži da dostave ispunjenu aplikacionu formu, te ostale aplikacijom zahtijevane dokumente i to isključivo putem on-line platforme za apliciranje dostupne na linku:

<http://tender.protivkorupcije.ba/>



MLADI ŽELE PRIZNATE I VALIDNE DIPLOME



U Bosni i Hercegovini djeluje više od 40 visokoškolskih ustanova koje funkcionišu u 12 obrazovnih sistema, a mladi koji se obrazuju žele da diplome koje steknu budu priznate kako kod nas tako i u svijetu. Pripremna istraživanja i analiza su pokazali da postoje visokoškolske ustanove koje nemaju validne licence i akreditacije bez ikakvih sankcija izdaju diplome studentima, direktno ugrožavajući njihov položaj i prava na tržištu rada. Neformalna grupa studenata, okupljena oko problema nelegalnog rada visokoškolskih ustanova u Republici Srpskoj i izdavanja diploma od strane nelicenciranih i neakreditovanih ustanova bori se za rješavanje ovog problema.




Grupa studenata je organizovala info štand u Doboju sa ciljem upoznavanja šire javnosti o ovom problemu te su tom prilikom mladima, ali i ostalim građanima, iznijeli svoje stavove o ovom prisutnom problemu, ne samo u Republici Srpskoj, već i u cijeloj Bosni i Hercegovini.

Nakon toga je u Republici Srpskoj stupio na snagu novi Zakon o visokom obrazovanju, koji bi svršenim studentima trebalo da obezbedi validne i priznate diplome.

Naime, izmjenom postojećih rješenja samo akreditovane visokoškolske ustanove mogu izdavati javne isprave, odnosno diplome. Akreditacija je ubuduće obavezna za sve fakultete i visoke škole u RS, dok je u dosadašnjem zakonu bilo dovoljno da rade i obavljaju delatnost visokog obrazovanja, ako su ispunjavali propisane kadrovske, prostorne i materijalno-tehničke uslove za izvođenje nastave i da su upisani u Registar visokoškolskih ustanova.

„Generalni problem su diplome - studenti trpe ogromne posljedice jer po završetku studija ne mogu ostvariti svoja prava na tržištu rada, a uložili su mnogo truda, sredstava i vremena“

Danijela Nikolić, studentica.

-  **Neformalna grupa građana “ Licencirane i akreditovane visokoškolske ustanove - validne i priznate diplome “**
-  **Doboj**
-  **Licencirane i akreditovane visokoškolske ustanove - validne diplome**



NAŠE RIJEKE, NAŠE PRAVO NA OPSTANAK

Udruženje građana „Bjelava“, te neformalnu grupu građana Sačuvajmo rijeke Foče osnovali su građani Foče kako bi započeli borbu protiv izgradnje mHE na rijekama Bjelava, Velika i Mala Bjelava. U jeku pandemije koronavirusa, u martu 2020. godine, preduzeće „Srbinjeputevi“ započelo je pripremne radove na izgradnji dvije male hidroelektrane na rijekama Bjelava i Mala Bjelava na području opštine Foča, iako je tek nakon mjesec dana dobijena zvanična dozvola za početak radova na terenu.





Građani Foče su nakon poslatog zahtjeva Ministarstvu energetike i rudarstva RS da preispitaju zakonitost geoloških istraživanja na području Velike i Male Bjelave, organizovali proteste kako bi ukazali na veliko nezadovoljstvo zbog aktuelnih i planiranih radova na izgradnji većeg broja mHE na području opštine Foča. Građani Foče ističu "da prilikom dodjele koncesije nije ispoštovan stav 3 javnog poziva u kojem stoji da je ponuđač dužan da prilikom izrade studija uvaži mišljenje Opštine Foča, odnosno preduzeća 'Izvor' a.d. Foča od 20.6.2016. godine i 17.3.2017. godine.

„Ovo znači da ćemo se morati iseliti odavde, kada ne bude rijeke i ovog korita, kad ne budemo imali vodenice, mi nemamo šta više ovdje raditi“;

Miloš Vujičić, mještanin i vlasnik vodenice na rijeci Bjelava.

Glavni republički vodni inspektor je 14. jula izdao naredbu o zaustavljanju radova na rijekama Bjelava i Mala Bjelava iako su već tada radovi na probijanju trase puta za potrebe geoloških istraživanja bili završeni. Osim toga, uprkos upozorenjima građana, radove na rijeci Velika Bjelava glavni republički vodni inspektor uopšte nije konstatovao u svom izvještaju.

Uprkos zahtjevu za posebnom tematskom sjednicom sa temom izgradnje mHE Bjelava, zakazana je redovna 41. sjednica Skupštine Opštine Foče, na kojoj su se građani Foče trebali obratiti odbornicima i predstavnicima lokalne izvršne vlasti sa zahtjevima za obustavu radova na izgradnji mHE na rijekama Bjelava, Mala i Velika, ipak ista je otkazana zbog nedostatka kvoruma, što se nije desilo u posljednjih 10 godina.

-  Udruženje građana „Bjelava“, Foča
-  Foča
-  ugbjelava@gmail.com
-  [SacuvajmoRijekeFoce; ugbjelava](#)



KOME IDE NOVAC GRAĐANA

“Mora se stati u kraj malverzacijama i manipulacijama - postoje fantomska udruženja koja naš novac zbog ko zna kakvih interesa iskorištavaju”,

Davor Simikić,
Udruženje Turistička zajednica Brčko Distrikta BiH




12 neprofitnih organizacija, okupljenih u neformalnu grupu “Za transparentno finansiranje neprofitnih organizacija iz budžeta Brčko distrikta” bore se za povećanje transparentnosti, a smanjenje korupcije i zloupotrebe javnih sredstava u procesu finansiranja neprofitnih organizacija u Distriktu.

Oni su na konferenciji za medije predstavili „Polugodišnji izvještaj o praćenju finansiranja neprofitnih organizacija iz budžeta Brčko distrikta“. Civilnim praćenjem budžetskog finansiranja civilnih i drugih neprofitnih organizacija u Brčko distriktu BiH utvrđeno je da u pripremi budžeta za 2020. godinu predstavnici civilnog društva nisu bili na odgovarajući način uključeni. Naime, dodjela najvećeg dijela sredstava neprofitnim organizacijama u prvoj polovini 2020. vršena je bez raspisanog javnog poziva, kriterijuma i dovoljno opravdanosti i najveći dio neprofitnih organizacija i njihovih potreba za finansiranjem iz budžeta Brčko distrikta BiH je bio zapostavljen.

U Skupštini Brčko distrikta BiH je održana i javna rasprava o Nacrtu zakona o udruženjima i fondacijama Brčko distrikta BiH te je konačno usvojen Zakon o udruženjima i fondacijama Brčko distrikta što predstavlja jedan je od koraka ka uređivanju stanja u oblasti finansiranja neprofitnih organizacija u Brčko distriktu, odnosno prekida netransparentne i koruptivne prakse u ovoj oblasti.



 Neformalne grupe “Za transparentno finansiranje neprofitnih organizacija iz budžeta Brčko distrikta”

 Brčko

 GrantoviNVOBrckoDistrikt

ZAPOČETA JE SARADNJA I SA NOVIM GRUPAMA



Neformalna grupa građana sastavljena od mještana naselja Luka u Goraždu, pokrenula je inicijativu za borbu protiv gradnje zidova na obali rijeke Drine. Na planiranju i gradnji obaloutvrde u naselju Luka intenzivnije se počelo raditi nakon poplava iz decembra 2010. godine, koje su uzrokovane velikim padavinama i nekontrolisanim ispuštanjem vode iz HE „Piva“ Mratinje. Tada je građanima ovog grada nanesena ukupna šteta veća od 15 miliona maraka.




Poslije nekoliko godina pripreme, te nakon što je Svjetska banka odobrila kreditna sredstva, radovi na izgradnji obaloutvrde su počeli u aprilu 2019. godine. Glavni projekt podijeljen je na nekoliko pod-projekata a vrijednost investicije je oko 10 i po miliona maraka. Građani sumnjaju na koruptivne radnje od strane uprave Grada Goražda prilikom odabira projekta jer je proces odabira najboljeg projekta prije izgradnje obaloutvrde u naselju Luka bio netransparentan tj. građani nisu bili upoznati sa izabranim niti ponuđenim projektima/rješenjima, urbanističku i građevinsku dozvolu donijela je prema Uredbi nenadležna gradska Služba, a bez obzira na nezadovoljstvo građana, gradske vlasti i dalje ignorišu njihovo mišljenje u vezi dalje izgradnje obaloutvrde dato na javnoj raspravi 02.07.2020.g.

SPASIMO DRINU

Građani Goražda su dva puta organizovali protestne šetnje kako bi ukazali na nezadovoljstvo zbog izgradnje obaloutvrde duž cijele obale rijeke Drine u centru grada koji ugrožava život lokalnog stanovništva te kako bi pozvali na odgovornost svih strana u ugovoru za izgrađeni sporni zid ispod naselja Luka. Osim toga organizovan je i info pult gdje su zainteresovani građani informisani o ovoj borbi protiv netransparentnog procesa izgradnje obaloutvrde, tj. izgradnje zida na rijeci Drini kroz sami centar grada Goražda. Putem zvanične Facebook stranice grupe emitovan je i otvoreni program u kojem se sa građanima ali i stručnjacima razgovaralo o problemu i potencijalnim rješenjima. Nakon toga je uslijedila odluka Federalnog ministarstva prostornog uređenja da se poništava urbanistička saglasnost i odobrenje za gradnju obaloutvrda koja je konačna, te nije dopuštena žalba.

Trenutni cilj neformalne grupe građana Spasimo Drinu je da trajno zaustave izgradnju postojećeg rješenja obaloutvrde, koje je u suprotnosti sa interesom lokalnog stanovništva, te da pronade zajedničko rješenje obaloutvrde koje će biti prihvatljivo građanima opštine Goražde. Također, građani okupljeni ovu neformalnu grupu žele ukazati na sve propuste nadležnih institucija u procesu odabira i izgradnje tehničkog rješenja obaloutvrde.

„Ne damo Drinu, Drina nam je sve“
Mirsad Kadrić, mještanin

-  Neformalna grupa građana
“Spasimo Drinu”
-  Goražde
-  Spasimo Drinu



HRABRE ŽENE KRUŠČICE






Grupa mještanki iz sela Kruščice u Vitezu okupila se u borbi protiv izgradnje mHE na rijeci Kruščici te su simbolično nazvane Hrabre žene Kruščice pošto su više od 500 dana i noći blokirale most preko istoimene rijeke, kako bi spriječile izgradnju dvije mini hidroelektrane. One su svojim tijelima spriječile investitore da započnu izgradnju mini hidroelektrana 2017. godine tako što su u više navrata blokirale prolaz građevinskim strojevima na „mostu“ koji je sada već simbol otpora običnog čovjeka pravnom nasilju zarad privatnih interesa. 24. augusta 2017. godine su hrabre žene Kruščice pretrpjele i strašno fizičko nasilje od snaga specijalne policije SBK u odbrani rijeke Kruščica. Ove godine su na taj dan organizovale performans i otvoreni program kako bi ponovo javnost i nadležne podsjetile da ne odustaju od svoje borbe.

Kantonalni sud u Novom Travniku je 2018. godine presudio da ekološka dozvola za izgradnju brane na rijeci Kruščici bude odmah poništena, što znači da će bilo kakvi dalji radovi na izgradnji brane biti nezakoniti. Sudska presuda da se poništi dozvola za izgradnju brane donesena je na osnovu činjenice da niko iz zajednice koja je ugrožena izgradnjom planirane brane nije pozvan na obaveznu javnu raspravu, niti su upoznati sa rezultatima javne rasprave.

Ova borba bila je povod za osnivanje udruženja Eko Bistro Kruščica, koje je pokrenulo i građansku inicijativu za vraćanje prostornog plana opštine Vitez, odnosno prostornog plana posebne namjene Kruščica u prvobitno stanje, što podrazumijeva brisanje ucrtanih mHE na rijeci Kruščici, jer ali sve dok planirane mHE ne budu izbrisane iz prostornog plana, rijeka Kruščica nije trajno zaštićena što je krajnji cilj hrabrih Žena Kruščice.

„Mi smo stalno na oprezu i nastavljamo da branimo most, jer znamo da je još uvijek dug put pred nama da zaštitimo naše rijeke i zajednicu od investitora”,

Tahira Tibold, mještanka

-  Neformalna grupa građana „Hrabre žene Kruščice“
-  Kruščica, Vitez
-  Ekološko društvo Bistro

Građani Mostara zajedno sa ekološkom udrugom Majski cvijet, pokrenuli su inicijativu protiv izgradnje mini hidroelektrana Buna 1 I 2 na rijeci Buni. Na lokalitetu Bunskih kanala početkom juna 2016. godine trebalo je da počne gradnja dvije mini hidroelektrane kapaciteta do pet megavata. Dodjela ove koncesije sporna je ne samo zbog činjenice da se lokalitet nalazi u dijelu toka Neretve koji je ranijom odlukom proglašen spomenikom prirode u ekološko-ribarskoj zoni, zaštićenim posebnim staništem, već i zbog podatka da je nadležno ministarstvo dodijelilo koncesiju bez saglasnosti lokalne zajednice i Gradskog vijeća.

Udruženje Majski cvijet je uočilo cijeli niz nepravilnosti I proceduralnih pogrešaka prilikom dodjele koncesije, počevši od kršenja procedura i propisa usvajanjem Izmjena i dopuna Prostornog plana Grada Mostara koji nije usaglašen sa postojećim Planom BiH iz 1980. godine te objave Prostornog plana u Službenom glasniku koji nije prethodno potpisan od strane predsjednika Gradskog vijeća. Osim toga, mještani nisu bili uključeni putem javne rasprave iako je uključivanje mišljenja građana propisano Zakonom o principima lokalne samouprave FBiH te je načinjena povreda procedure prigodom provođenja javne rasprave i lažiran zapisnik na osnovu kojeg je izdata okolinska dozvola.

Zbog svega toga, građani su podnijeli 2016. godine tužbu protiv Federalnog ministarstva okoliša radi poništenja okolinske dozvole koja do danas nije riješena. U međuvremenu, umjesto da postupak miruje dok se ne riješi spor investitor je predao zahtjev za izdavanje Urbanističke suglasnosti. Udruženje je skupljenu dokumentaciju zajedno sa 5000 potpisa građana protiv izgradnje ove dvije mHE dostavila Gradu Mostaru i Odjelu za urbanizam sa zahtjevom da se investitoru ne izda urbanistička suglasnost koju je zatražio. Odjel za urbanizam prihvata njihov zahtjev i u maju 2019. odbija izdati urbanističku suglasnost investitoru.

STOP IZGRADNJI MHE NA BUNSKIM KANALIMA



Investitor se žali kantonalnom Ministarstvu graditeljstva i prostornog uređenja koje poništava rješenje Odjela za urbanizam i nalaže ponovni postupak. Zbog svega toga u februaru 2020. je održana - usmena rasprava između stranki u postupku i trenutno se čeka rješenje voditelja postupka tj. Odjela za urbanizam Grada Mostara.

Kantonalni sud u Sarajevu je u septembru poništio okolinsku dozvolu za izgradnju dvije mini hidroelektrane na Bunskim kanalima, prirodnom fenomenu na rijeci Neretvi. Postupak se mora provesti ponovo zbog neregularnosti u izdavanju i zanemarivanja činjenica koje su ekološke organizacije isticale u procesu.

Cilj građana okupljenih oko ove inicijative je da zaustave proces izdavanja dokumentacije za izgradnju mHE Buna 1 I mHE Buna 2.

„Ovo što vlast radi ne bi palo na pamet ni Geringu, nekadašnjem njemačkom zlikovcu, koji je mrzio ljude, a nije prirodu, a ovi mrze i ljude i prirodu i lokalno stanovništvo“,

Miroslav Barišić, mještanin



Ekološka udruga Majski cvijet



Mostar



Stop izgradnji mHE na Bunskim kanalima



Grupa građana okupljenih oko inicijative Hastahana park pokrenula je radove koji mogu izmjeniti lokalitet parka Hastahana. Općina Centar u Sarajevu je kroz izmjenu Regulacionog plana u julu 2019. godine pokrenula prenamjenu parka Hastahana i time ignorisala volju građana koji se izričito protive pretvaranju parka u poslovni kompleks (izgradnja zgrade Centralne banke, podzemne garaže i drugih popratnih sadržaja).

Općina je u procesu izmjene Regulacionog plana ignorisala pismeni komentar koji je potpisalo 749 građana i nije ga uvrstila u dokumentaciju za sjednicu na kojoj se glasalo za izmjene Regulacionog plana, zatim nije osigurala da se Javna rasprava održi u skladu sa propisima i nije odgovorila na prigovor građana. Osim svega navedenog nije uvažila činjenicu da je lokalitet parka uvršten na Privremenu listu nacionalnih spomenika te da se nalazi na jednom od dva ključna urbana ventilaciona koridora i da se ne preporučuje gradnja zgrada nego unaprijeđenje zelene površine.

Cilj ove inicijative je zaustavljanje bilo kakvih radova koji mogu izmjeniti lokalitet parka Hastahana prema uputi Povjerenstva za očuvanje nacionalnih spomenika do okončanja postupka proglašenja Povijesnog urbanog krajolika Sarajeva (Gradske ambijentalne cjeline Sarajeva) nacionalnim spomenikom te stavljanje van snage izmjene Regulacionog plana, jer su donesene suprotno mišljenju građana Općine Centar. Građani traže ponovo održavanje Javne rasprave na kojoj će moći ravnopravno učestvovati i iznijeti svoje stavove oko uređenja parka Hastahana.


HASTAHANA PARK



„Hastahana je park svih nas, on pripada različitim generacijama Sarajeva, djeci, mladima, penzionerima. To je mjesto sureta različitih generacija. Učinimo park istinskim parkom, ne dozvolimo betonu da zauzme to mjesto“

Sanida Hasanović Čar.

5. avgusta 2020. u parku Hastahana bez ikakvog nadzornog organa započeto je uklanjanje umjetničkih skulptura „Zvezdani put“ njemačkog umjetnika Helmunta Lutza na neadekvatan devastirajući način, o čemu su građani usmenim i pismenim putem obavijestili općinsku i kantonalnu inspekciju koje nisu izašle na lice mjesta, nego je komunalni inspektor samo naknadno uputio obavijest podnosiocu zahtjeva da se „pristupilo privođenju zemljišta krajnjoj namjeri u skladu sa važećim Regulacionim planom“. Grupa građana okupljena oko inicijative „Hastahana park“ se zatim odmah pismenim putem obratila načelniku općine Centar sa upozorenjem o posljedicama nestručnog uklanjanja skulpture vrijedne milion eura te zatražila odgovore na pitanja - ko je naredio premještanje skulpture, ko je izvođač radova, na koji način je odabran izvođač radova i ko je donio odluku da skulptura bude doslovno uništena.

 Inicijativa Hastahana park

 Sarajevo

 Hastahana park



Grupa građana iz Zenice okupila se sa ciljem borbe protiv nenamjenskog i netransparentnog trošenja sredstava Fonda za zaštitu okoliša FBiH. Naime, Vlada ZDK i resorno kantonalno ministarstvo nenamjenski i netransparentno troše sredstava od okolišnih naknada koje svake godine Fond za zaštitu okoliša Federacije BiH uplaćuje na račun kantona. Posljedično, sredstva koja iz ovog Fonda dobija Grad Zenica, takođe se troše nenamjenski i netransparentno.

Iako je zagađenje zraka najveći problem grada Zenice u dosadašnjoj praksi utroška namjenskih sredstava Fonda nije bilo projekata s ciljem poboljšanja kvaliteta zraka, nego su se finansirali projekti raznih sportskih udruženja, organizacija proisteklih iz rata i u prosjeku dodjeljivalo se oko 500 do 1.000 KM po projektu, što je simboličan iznos.

Sredstva Fonda za zaštitu okoliša FBiH su se dodjeljivala putem Javnih poziva samo za dvije namjene, upravljanje otpadom i jačanje svijesti, dok u Zakonu o Fondu zaštite okoliša jasno stoji da se prikupljena sredstva trebaju namjenski utrošiti za projekte zaštite okoliša i očuvanje i poboljšanje kvaliteta zraka.

INICIJATIVA ZA NAMJENSKO I TRANSPARENTNO TROŠENJE SREDSTAVA FONDA ZA ZAŠTITU OKOLIŠA FBiH

Podsjetimo, svake godine Fond za zaštitu okoliša Federacije BiH, na temelju Uredbe prikupi značajna sredstva od okolišnih naknada koje se trebaju namjenski utrošiti za projekte zaštite okoliša i očuvanje i poboljšanje kvaliteta zraka. Prikupljena sredstva od okolišnih naknada, prema Zakonu o Fondu raspoređuju se u omjeru 70% sredstava pripadaju kantonima, a 30% sredstava pripadaju Federaciji -koja se realizuju putem Fonda.

Nadalje, u svom Izvještaju iz 2019. godine Ured za reviziju institucija u FBiH navodi da ZDK ne raspolaže informacijama o utrošku sredstava za zaštitu zraka, odnosno da ne postoje evidencije o utrošku sredstava za zaštitu kvaliteta zraka što je dovoljan razlog na sumnju u netransparentnost i nenamjenski utrošak sredstava koje Fond uplati na račun ZDK.

Trenutni cilj građana Zenice je da učine javno dostupnim podatke o trošenju sredstava dobijenih od strane Fonda za zaštitu okoliša ,namijenjenim zaštiti zraka, a potrošenih od strane Vlade ZDK I Grada Zenica te da minimalno 50% projekata podržanih iz sredstava dobijenih iz Fonda za zaštitu okoliša imaju za cilj poboljšanje kvalitete zraka.



Inicijativa Inicijativa za namjensko i transparentno trošenje sredstava Fonda za zaštitu okoliša FBiH



Zenica



NGG-Dimnjačari

Korupcija nije problem pojedinca!!!

Grupa ste građana koja se suočava sa korupcijom u vašoj zajednici i zbog toga ne možete da ostvarite pravo koje pripada vama ili širem krugu ljudi?

Trpите posljedice loših odluka donesenih usljed zlorabotrebepoložajaovlaštenihlica ilinezakonitog postupanja vlasti?

Kontaktirajte nas u cilju dobijanja podrške vašim inicijativama u borbi protiv korupcije

063 396 536

protivkorupcije@ccibh.org








NERETVICA ĆE VJEČNO TEĆI

Građanska inicijativa „Pusti me da tečem“ iz Konjica poznata je javnosti po svojoj borbi protiv izgradnje 15 mini-hidroelektrana na rijeci Neretvici i njenim pritokama. Cilj građana je stavljanje okolišne dozvole, do koje je Elektroprivreda, kao investitor, došla na sumnjiv način, van snage i zaustavljanje procesa izgradnje mHE na rijeci Neretvici.

„Njihovo je da probaju, naše je da ne damo i neće dobiti garantujemo“,

Vejsil Hondo, mještаниn




-  Udruženje građana – Neretvica „Pusti me da tečem“
-  Konjic
-  buturovicpolje
-  www.pustimedatecem.com
-  pustimedatecem@gmail.com





ODBRANIMO RIJEKE VIŠEGRADA

Neformalna grupa građana pod nazivom „Odbranimo rijeke Višegrada“ se početkom 2020. godine okupila sa ciljem očuvanja rijeka i sprječavanja gradnje malih hidroelektrana. Cilj inicijative je spriječiti izgradnje mHE na rijekama Rzav i Jablanica na području opštine Višegrad, jer su suprotne volji većine građana opštine Višegrad, stručne javnosti i ekoloških aktivista, te pogoduju primarno investitoru i, potencijalno, interesu pojedinaca koji su im omogućili ovaj posao.

-  Neformalna grupa građana „Odbranimo rijeke Višegrada“
-  Višegrad
-  Odbranimo rijeke Višegrada

„Polako sve nas čeka isti scenario sa problemima u vodosnabdijevanju ako se ne probudimo protiv zla zvanog #mHE“,

Đorđe Lazović, mještanim

PROJEKTI VOĐENJA GRAĐANSKIH INICIJATIVA I KAMPANJA U OBLASTI BORBE PROTIV KORUPCIJE

CCI je u okviru javnog poziva za projekte vođenja građanskih inicijativa i kampanja u oblasti borbe protiv korupcije odabrao 13 organizacija/udruženja koje su započele realizaciju planiranih aktivnosti.

Udruženje građana “Ženski interaktivni ruralni centar” pokrenulo je projekat “Prevenција korupcije u zdravstvenom sistemu Bosne i Hercegovine” kako bi se smanjio nivo korupcije u zdravstvenom sistemu ustanova iz sarajevskoromanijske regije putem uspostavljanja jednoobraznog sistema prijave korupcije i izmjena i dopuna postojećih pravilnika i propisa.

Udruženje “Baby Steps” je započelo projekat “Borba protiv korupcije u porodilištima” i vrši istraživanje i analiziranje trenutnog antikoruptivnog pravnog okvira u okviru zdravstvenih ustanova (porodilišta), te praksi i iskustava porodilja i medicinskih radnika. U tom cilju poslali su upiti za 12 porodilišta iz različitih dijelova BiH, te upiti za sedam ministarstava zdravstva/zdravlja (dva entitetska, te pet kantonalnih ministarstava). Takođe, otpočeo je proces anketiranja porodilja i medicinskog osoblja porodilišta.

Udruženje građana RS ”STOP MOBBING” započelo je projekat „Osiguranje pristupa pravdi za prijavitelje korupcije u zdravstvu kroz uspostavljanje mreže za podršku na regiji Istočne Hercegovine” u okviru koje je formirana lokalna Mreža za borbu protiv korupcije u zdravstvu Istočne Hercegovine koju sačinjavaju predstavnici nevladinih organizacija, zdravstvenih ustanova, predstavnici okružnog tužilaštva, suda, policije, jedinica lokalne samouprave i novinari. Mreža od oktobra 2020. godine kontinuirano pruža podršku potencijalnim prijaviteljima korupcije sa pomenute regije kroz treninge i radionice za predstavnike korisnika zdravstvenih usluga, pacijenata, neformalnih grupa i lokalnih NVO-a.

Udruženje građana “Tolerancijom protiv različitosti” (ToPeeR) pokrenulo je kampanju “Unapređenje devastiranog zdravstvenog sistema” te je u septembru 2020. formiralo Mrežu nevladinih organizacija i udruženja pacijenata, kao i zdravstvenih radnika koji pokrivaju teritoriju Dobojske regije. Planirano je da Mreža donese lokalnu Platformu za borbu protiv korupcije, sa setom konkretnih mjera i preporuka za smanjenje sitne korupcije u zdravstvenim ustanovama. Paralelno je otpočelo istraživanje o nivou i konkretnim vidovima sitne korupcije u zdravstvenim ustanovama u gradu Doboju i susjednim opštinama Petrovo i Stanari kroz anketiranje zdravstvenih radnika.

Omladinski centar Vermont iz Brčko distrikta BiH pokrenuo je kampanju „Transparentno do jakog poljoprivrednika“ u okviru koje je predao prijedlog Odjeljenju Vlade DB za formiranje radne grupe za izradu prijedloga transparentnog mehanizma dodjele podsticaja. U saradnji sa poljoprivrednim proizvođačima kreiran je spisak prijedloga izmjena u Pravilniku o raspodjeli sredstava. Dio predloženih izmjena je već kroz navedenu saradnju uvršten u Pravilnik u skladu sa zahtjevima poljoprivrednih proizvođača.

Građani Doboja, okupljeni u organizaciju Centar za humanu politiku, pokrenuli su kampanju „Da se ne ponovi maj 2014“ u okviru koje su izradili mapu sa spiskom ukupno 15 lokacija na području Grada Doboja na kojim je bespravno izgrađeno više objekata. Na istim lokacijama izvođeni su radovi bez ikakvih dozvola ili sa dozvolama privremenog karaktera čiji rok je istekao. Dio objekata i lokacija posjedovao je dozvole sumnjivog karaktera, što dodatno ukazuje različite zloupotrebe u ovom segmentu.

BIRNBIH je u okviru projekta „Transparentnošću protiv korupcije u pravosuđu“ uputio poziv građanima da prijave korupciju ili uočene nepravilnosti u radu pravosudnih institucija putem web stranice: <https://detektor.ba/2020/09/17/prijavite-slucajeve-korupcije-za-novinarska-istrazivanja-birn-u-bih/>, kao i svojih društvenih mreža. Tokom samo dvije sedmice trajanja kampanje, stiglo je 20 prijava (putem Facebooka, maila i telefona) na osnovu kojih su novinari odmah počeli da istražuju tri prijave, kako bi napravili priču na osnovu dostavljenih informacija.

Udruženje „Ja bih u BiH“ je u okviru kampanje „Bez štele i pošteno“ formiralo online platformu za generisanje i razmjenu sadržaja (OCD, institucija, građana) i plasman sadržaja za medije. Posebno je dat primat promovisanju kroz zajedničku antikorupcijsku online platformu www.antikorupcija.info. Izrađen je i dokument pod nazivom „Mladi i korupcija.“

Udruženje poslodavaca u Federaciji BiH je u sklopu svog projekta „Poslovanje bez korupcije“ formirala fokus grupu za izradu Zakona o jedinstvenom postupku izvođenja inspeksijskog nadzora sa 20 renomiranih kompanija iz cijele FBiH, koja ima za zadatak da analizira 8 postojećih zakona koje je potrebno izmijeniti s ciljem smanjenja korupcije, naročito u radu inspeksijskih organa. (Kompanije koje su potvrdile svoje učešće u radu fokus grupe su: Heilderberg cementara Kakanj, HT Eronet, Ataco Mostar, Ećo Company, Coca Cola HBC BH, Prevent, Bingo Tuzla, Sarajevski kiseljak, Ledo, GS TMT, Planet, Lutrija BiH, Imtec, DHL, Trgošped, Menprom Tuzla, Konzum, Hotel Europa, Pobjeda Tešanj i Feal).

Udruženje profesionalaca, trenera i službenika za javne nabavke u BiH pokrenulo je kampanju „Kroz zdravije javne nabavke do smanjenja korupcije u zdravstvu“ u okviru koje je tokom septembra sklopio dogovore sa rukovodstvima šest zdravstvenih ustanova sa područja Kantona Sarajevo i Sarajevsko - romanijske regije sa kojima će se raditi na kreiranju prijedloga internih akata (pravilnika) o javnim nabavkama kojima se u značajnoj mjeri može suziti prostor za moguću korupciju i povećati efikasnost i transparentnost u trošenju javnih sredstava.

Unija Udruženja poslodavaca Republike Srpske započela je kampanju pod nazivom „Smanjenje koruptivnih rizika u radu inspeksijskih službi u RS“ sa ciljem smanjenja mogućnosti za koruptivne radnje tokom inspeksijskog nadzora preduzeća u Republici Srpskoj. Ovom kampanjom se želi doprinijeti smanjenju motivacije inspektora za zloupotrebu diskrecionih prava odlučivanja kojima raspolažu tokom provođenja inspeksijskog nadzora nad preduzećima.

Helsinški odbor za ljudska prava pokrenuo je kampanju „Transparentno javno zapošljavanje – javni interes u borbi protiv korupcije u BiH“ kako bi doprinijeli prevenciji i smanjenju nivoa percipirane korupcije prilikom zapošljavanja u javnim ustanovama i javnim preduzećima na području šest kantona (Posavskog kantona, Tuzlanskog kantona, Bosansko-podrinjskog kantona, Srednjobosanskog kantona, Unsko-sanskog kantona i Zapadnohercegovačkog kantona) kroz kreiranje i primjenu anikoruptivnih mjera i mehanizama.

Udruženje građana Restart Srpska je u okviru svoje kampanje „Konkursom do posla!“ tokom avgusta realizovalo potpisivanje peticije u 7 gradova u Republici Srpskoj sa ciljem prikupljanja podrške građana za upućivanje inicijative za izmjene Zakona o sistemu javnih službi RS. Nakon što je prikupljeno oko 4000 potpisa, inicijativa je 10. septembra upućena u Narodnu Skupštinu Republike Srpske. Svrha ove inicijative je da se uspostavi obaveznu konkursnu proceduru i u javnim preduzećima i svim javnim ustanovama. Tokom prikupljanja potpisa u Novom Gradu došlo je i do incidenta, kada je šef kabineta načelnika Novog Grada nasrnuo na aktiviste Restart Srpska, nakon što je odbio da potpiše peticiju na glavnom trgu u ovom gradu. Ovaj incident je prijavljen u Policijskoj stanici Novi Grad gdje su podnijete i prijave za napad.



Održan je prvi trening za uspješne grant aplikante na temu: »Odnosi s javnošću – korištenje društvenih mreža i konvencionalnih medija«. Učešće na treningu uzela je 21 osoba iz 17 različitih organizacija. Učesnici treninga su se kroz praktičan rad upoznali sa sljedećim oblastima i vještinama: Uvod u odnose sa javnošću – uloga, vrste i karakteristike medija; organizovanje medijskih događaja (sa fokusom na press konferenciju); planiranje i provođenje PR (medijske) kampanje; on line promocija - uloga društvenih mreža; upravljanje nalozima na društvenim mrežama; alati na društvenim mrežama (promocija).



Građani u akciji



NASTAVLJA SE BITKA ZA SUTJESKU: GRADI SE MALA HIDROELEKTRANA NA GRANICI NACIONALNOG PARKA!
Građanski aktivizam



ČUVARI RIJEKA: VLADA FBiH MORA ŠTO HITNIJE PREĆI SA RIJEČI NA DJELA – RIJEKE NE DAMO!
Građanski aktivizam



OKC VERMONT – POKUŠAJ DOVOĐENJA U RED OBLASTI PODSTICAJA ZA POLJOPRIVREDNIKE...
Građanski aktivizam




HRABRE ŽENE KRUŠČICE TRAŽE IZJASNJAVANJE 151 KANDIDATA...
"Hrabre žene Kruščice" - inicijativa za sprječavanje gradnje MHE na rijeci Kruščici



DVA U JEDAN: STUDENTSKI PROTESTI U SARAJEVU
Građanski aktivizam

NOVOSTI



ANTIKORUPCIJA

Web portal antikorupcija.info ima za cilj da aktivira i motivira građane/ke da se pridruže u borbi protiv korupcije, prvenstveno kroz širenje informacija o borbi protiv korupcije, pozivanje na akciju, široko promovisanje uspješnih priča i slično .

Ukoliko želite da prvi imate informacije o svim koruptivnim dešavanjima u Bosni i Hercegovini, regiji i svijetu pravo mjesto za Vas je portal antikorupcija.info, online prostor gdje se afirmišu svi oni hrabri ljudi koji se bore protiv korupcije.

Web portal ima odvojeni segment pod nazivom Građani u akciji, u kojem je medijski prostor dat građanskim grupama koje se bore protiv korupcije i neregularnostima u njihovoj lokalnoj zajednici te problemima inicijativa. U okviru tog segmenta navedene su aktivne kampanje kojima podršku pruža CCI te su objašnjeni problemi svake grupe i navedene Facebook stranice putem kojih se može pratiti njihov rad. Putem tog segmenta na portalu se objavljuju sve aktuelnosti o grupama, sva dešavanja u vezi sa rješavanjem problema.

Osim toga, još jedan odvojeni segment je Podrška u borbi putem koje je omogućeno pružanje podrške neformalnim grupama kroz potpisivanje online peticija itd.

U svim segmentima, fokus je stavljen na aktualiziranje problema korupcije u Bosni i Hercegovini te u regiji i svijetu kao i na pružanje podrške svim građanima koji se organizovano bore protiv korupcije u lokalnoj zajednici.

Na portalu se nalaze segmenti Vijesti, U fokusu, Intervjui, Komentari i analize, Regija i svijet, Podcast, Podsjećanja i Lični stav.

UKC RS I DALJE ODBIJA DA OBJAVI UGOVOR SA PROINTEROM: TE INFORMACIJE SU POSLOVNA TAJNA

Tokom tromjesečnog perioda TI BIH je podnio 27 zahtjeva za monitoring Agenciji za javne nabavke, te su podnesene krivične prijave i to Okružnom javnom tužilaštvu Banja Luka protiv rukovodstva Instituta za javno zdravstvo RS zbog spornih nabavki medicinske opreme od nekvalifikovanih ponuđača, te Tužilaštvu Kantona Sarajevo protiv rukovodstva Cesta Federacije BIH zbog zaključenja ugovora o dodatnim radovima bez provođenja postupka javnih nabavki, kao i mijenjanja postojećih odredbi ugovora zaključenim aneksima.

PRATIMOTENDERE.BA



PRATIMO TENDERE

Udruženje CRMA je razvilo i izgradilo web platformu PratiMo tendere (pratimotendere.ba), koja korisnicima – prije svega građanima, ali i istraživačima, novinarima, institucijama i generalno opštoj javnosti - omogućava praćenje javnih nabavki i otkrivanje rizičnih javnih nabavki i nabavki sa elementima korupcije. Održane su i edukacije mreži organizacija civilnog društva za korištenje web platforme pratimotendere.ba, kao i unos svih prikupljenih monitoring podataka u web platformu. Paralelno su rađene i analize, te su uočeni indikativni trendovi malverzacija u sistemu javnih nabavki.



USAID
OD AMERIČKOG NARODA



CENTRI CIVILNIH INICIJATIVA
ЦЕНТРИ ЦИВИЛНИХ ИНИЦИЈАТИВА



CENTAR ZA RAZVOJ MEDIJA I ANALIZE

JAVNI POZIV VOLONTERIMA

ZA UČEŠĆE U BORBI PROTIV KORUPCIJE U JAVNIM NABAVKAMA



Nudimo vam:

- edukaciju u oblasti monitoringa javnih nabavki
- mogućnost sticanja iskustva u antikorupcijskom aktivizmu
- izgradnju sopstvenih kapaciteta
- rad u stimulativnom okruženju
- podršku u učenju i savladavanju izazova
- potvrdu o stečenom iskustvu

Od vas očekujemo:

- da ste u dobi od 18 do 30 godina
- da ste ambiciozna osoba spremna na učenje
- da ste spremni aktivno učestvovati u borbi protiv korupcije
- da ste otvoreni za sticanje novih iskustava
- da ste spremni savjesno i odgovorno realizovati preuzete zadatke

CV i pismo namjere pošaljite na
e-mail: volonteripratimotendere@gmail.com



KOLIKO STRANKE POŠTUJU ZAKONE PRIJE I TOKOM IZBORNE KAMPANJE?

Transparency International je odabrao 74 lokalna posmatrača koji vrše praćenje lokalnih institucija i obrazaca ponašanja političkih kandidata i zvaničnika prije i tokom izborne kampanje, sa ciljem da uoče i dokumentuju korištenje javnih sredstava i pozicija na vlasti u svrhu izborne promocije.

Tokom avgusta i septembra održane su četiri obuke za posmatrače, na kojima su, pored upoznavanja sa metodologijom praćenja i praktičnih vježbi, posmatrači imali priliku da čuju više o zakonskom okviru finansiranja političkih partija i zloupotrebi javnih sredstava. Izrađen je i priručnik za posmatrače, te online postavljeni upitnici koji služe posmatračima za dostavljanje informacija.

Do kraja septembra posmatrači su ispratili 427 javna događaja, 48 predizbornih skupova, te su evidentirali 924 primjera različitih vrsta zlouporaba javnih resursa. Zbog ovoga je podneseno 50 prijava nadležnim institucijama, a Centralna izborna komisija do kraja septembra je izrekla sankcije u šest slučajeva po TI BiH prijavama.

CIK BiH je novčano kaznila četiri politička subjekta zbog plaćenog oglašavanja prije zvaničnog početka izborne kampanje. Sa po 1.000 KM CIK je kaznio SDA, Platformu za progres, "Četvorku" – NS, NIP I SDP i Stranku za bolje Vučkovce i to zbog sponzoriranih objava na društvenim mrežama. Pored toga CIK BiH je kaznila i SNSD i Socijaldemokrate BiH sa po 1.000 KM zbog plaćenog oglašavanja prije zvaničnog početka izborne kampanje. Uz prijave TI BiH je CIK-u dostavio i fotografije bilborda Mladih socijaldemokrata (MSD) koji su u Banjaluci istaknuti na više lokacija kao i slike bilborda gradske organizacije Socijaldemokrata BiH Srebrenik.

TI BiH je izradio mobilnu aplikaciju "Reflektor", koja omogućava izvještavanje građana u realnom vremenu o eventualnim zloupotrebama javnih sredstava i funkcija u svrhu izborne kampanje kao i nepravilnostima koje se pojavljuju u toku kampanje za Lokalne izbore u BiH 2020.

SUKOB INTERESA



Transparency International u BiH (TI BiH) je u saradnji sa Fondacijom Centar za javno pravo (FCJP) organizovao u septembru konferenciju pod nazivom „Sprečavanje sukoba interesa u BiH: zakonska regulativa“ sa ciljem iznalaženja najoptimalnijeg rješenja za zakonsko regulisanje oblasti sukoba interesa u BiH.

Naime, trenutni zakonski okvir koji reguliše pitanje sukoba interesa na državnom nivou je nezadovoljavajući i ne predviđa efikasne mehanizme zaštite, dok se na nivou Federacije BiH uopšte ne sprovodi od 2013. godine. Neadekvatno regulisanje ove oblasti prepoznato je i u Mišljenju Evropske unije za članstvo BiH, gdje reforma oblasti sukoba interesa predstavlja jedan od 14 prioriteta naglašenih u Mišljenju. TI BiH je u proteklom periodu predlagao rješenja u ovoj oblasti u skladu sa najboljim međunarodnim standardima i praksama, a neka od njih se nalaze u zakonodavnoj proceduri.

TI BiH je izradio Registar nosilaca javnih funkcija koji sadrži informacije o mandatima izabranih i imenovanih zvaničnika na svim nivoima vlasti u BiH. Registar će omogućiti pretragu nosilaca javnih funkcija sa višestrukim angažmanima, pretragu prema političkom subjektu kojem nosilac javne funkcije pripada, institucijama vlasti, administrativnom nivou na kojem obavlja funkciju i slično.



Zaštita zviždača

Transparency International BiH je u septembru 2020. godine objavio dokument Zakonodavstvo i praksa zaštite uzbunjivača u Bosni i Hercegovini čiji je fokus na identifikaciji prepreka za adekvatnu zaštitu uzbunjivača i temeljnim pitanjima vezanima za efikasnost institucija u pružanju podrške i zaštite uzbunjivačima. Objavljeni dokument obuhvata i konkretne preporuke koje će poslužiti će kao osnova za dalje aktivnosti zagovaranja u ovoj oblasti.

Građani mogu anonimno prijaviti korupciju putem besplatne linije 0800 55555 ili e-mail adrese centar@ti-bih.org.



TRANSPARENCY INTERNATIONAL U BIH
CENTAR ZA PRUŽANJE
PRAVNE POMOĆI

**PRIJAVI
KORUPCIJU**

POTRAŽI PRAVNU POMOĆ

0800 55 555

WWW.PRIJAVIKORUPCIJU.ORG
WWW.TI-BIH.ORG





Podržano:



USAID
OD AMERIČKOG NARODA

Ova publikacija omogućena je uz podršku američkog naroda putem Američke agencije za međunarodni razvoj (USAID).

Sadržaj ove publikacije je isključiva odgovornost Centara civilnih inicijativa (CCI) i ne mora nužno odražavati stavove USAID-a ili Vlade Sjedinjenih Američkih Država.